

# Emprender, sa scuntrar e survegnir novs impuls

Trenta onns curs da stad per la magistraglia grischuna

■ **(anr/fa) Actualmain frequentan 350 magistras e magisters a Cuira a la Scol'auta da pedagogia in da la ventgna da curs da stad. Quests curs vegnan realisads quest onn per la trentavla giada.** Grond travasch quest'emna a Cuira en la Scol'auta da pedagogia dal Grischun (SAP): En ils corridors èn exposts meds d'instrucziun, da differents roms e per tut ils stgalims, da la scolina fin tar il stgalim aut. Participants da l'emna da curs sfeglian en ils meds en tut las trais linguas chantunalas grischunas. Auters gaudan l'inscunter cun anteriuras conscolaras e conscolars. Ils emprims curs da stad grischuns èn vegnids purschids avant trent'onns.

## Entschet cun dus curs

«Dal 1988 aveva gì l'inspectorat da scola l'idea da porscher a la magistraglia grischuna a Cuira curs da stad», ha infurmà *Luzius Mayer*, il respunsabel per la scolaziun supplementara a la SAP, mesemna a chaschun d'ina orientaziun dals meds da massa, «cumenà han ins quel onn cun dus curs, oz vegnan purschids var ventg curs.» Ils curs che vegnan realisads durant la tschintg- e la sesavla emna da las vacanzas da stad vegnan frequentads surtut da persunas d'instrucziun da la scolina e da la scola primara. Per dar in'invista en la varietad dals curs da stad han pudì visitar ils represchentants dals meds da massa trais curs.

## Fieu e flamma per lingua e cultura

En la cuschina da la SAP eran 15 persunas fatschentadas cun preparar las ingre-



**Luzius Mayer, il manader da la scolaziun supplementara a la SAP, e Francesca Cangemi che maina il curs «lingua e cultura taliana».** FOTO F. ANDRY

dienzas per cuschinar in bun past talian, discurrend e riend: «Ils participants da quest curs sa preparan per instruir talian en scola primara», ha declerà Mayer, «l'emna passada han els s'occupads da la didactica linguistica, quest'emna stat la vita e cultura dal talian en il center.» Che pro la cultura taliana tutgia naturalmain er la cuschina, ha'l agiunt. La manadra dal curs è *Francesca Cangemi* da Cuira, oriunda da la Sicilia. En pliras stanzas da scola eran londervi magistras e magisters a crear gieus per emprender linguas: «Per giugar quests gieus dovri er fortuna,

uschia ch'er ils uffants pli debels han la pussaivladad da gudagnar», ha ditg la manadra dal curs *Ursina Gloor*. En l'ufficina da la SAP eran londervi a preparar ils manaders dal curs *Ruedy Schwyn* e *Beat Zbinden* e lur scolars trais sculpturas, stailas, trianguls e rintgs, surtratgs cun material inflammabel: «Quai che nus faschain qua è la cuntinuaziun da l'instrucziun da dissegn en il spazi», hani explitgà.

## Dumber da participants reduci

Da l'onn 2004 aveva decis il cussegli

grond ch'il chantun na paja pli naginas contribuziuns als curs, ch'ils magisters stoppian sezs surprendre quels custs. «Quai ha gì per consequenza ch'il dumber da participants ha sa diminui per la mesadad», ha ditg *Johannes Flury*, il rector da la SAP, «magistras e magisters che vegnan sustegnids da lur vischnancas frequentan plitost ils curs che quels che ston pajar tut sezs.» Da questa situaziun na s'han laschads ils participants betg prender il plaschair. Els han fatg ina gronda festa da giubileum ed ars las trais sculpturas.

## Avertura d'in center didactic

Dapi mesemna stat a disposiziun a tut las persunas che instruischan a la scolina e la scola populara en la SAP a Cuira il «center didactic per roms artistics». Qua survegnan ils interessats gratuitamain material d'infurmaziun, novs impuls e schizunt ina cussegliaziun individuala per l'instrucziun. Las docentas *Sandra Crameri* e *Flurina Crüsi* han preschentà il center ch'è in project dals trais roms lavur manuala, lavurs manualas cun textilias e furmaziun creativa: Las persunas che vi-siteschan il center pon dar in sguard en material didactic visual ordinà tenor tematicas u material, ellas pon er emprestar infrastruttura, p.ex. roms per taiser, per far palperi u furns per cheramica da raku. «Igl è in project da pilot, per che nus possian cuntinuar al porscher essan nus dependents ch'el vegnia visità da bleras magistras e magisters», ha ditg Sandra Crameri.

**Uras d'avertura: Adina la mesemna da las 14.00 a las 17.00, las emprimas sondas dal mais (10.00–12.30) u s'annunziand per telefon 081 354 03 18.**